



2020-mit aallartittumik 2020-mut aningaasanut inatsit aqputigalugu ukiuni sisamani misiligutaasumik ukiumut 4 mio. kr-it angullugit salliutitsilluni, ulloq 1. januar 2020 aallarnerfigalugu meeqqanut inuusuttunullu sumiginnagaasunut ornigullutik pinaveersaartitsinermik suliaqartussanik "Unnuarissatut" taagorneqartunik isumassuisartunik illoqarfinni Nuummi, Tasiilami, Sisimiuni, Aasianni Qaqortumilu sisamangornermit nal. unnukkat arfineq pingasuniit sapaammi ullaakut arfineq pingasut tungaannut aqqusinerni angalaartartussanik pilersitsinissaq pillugu Naalakkersuisut pisussaaffilerneqarnissaannut Inatsisartuni aalajangiiffigisassatut siunnersuut.

(Inatsisartunut ilaasortaq Peter Olsen, Inuit Ataqtigiiit)

(Siullermeerneqarnera)

Siullermik siunnersuuteqartoq qutsavigerusupparput ornigulluni pinaveersaartitsineq qaqqimmagu uangut politikerit innuttaasullumi pikkorinnerulerfigisinnaalluagarput.

Tujorminarpoq takusarlugit meeqqat unnuami aneertut, pissutsit assigiinngitsut pissutigalugit angerlarumaneq ajornertik pissutigalugu imaluunniit angajoqqaat meeqqat angerlarfissaat pillugu killiliineq nalummasuk.

Naalagaaffiit Peqatigiiit meqqaat pillugit isumaqatigiissutaanni nunatsinni malinneq ajukkatsinnut ilaavoq Naalagaaffiit Peqatigiiit isumaqatigiissutaanni artikili normu 5:

Angajoqqaat akisussaannerat oqaatigineqarluni pisortat angajoqqaat akisussaannerat ataqqissagaat ikiutissasulu pisariaqarpat.

Taamaattumik pingaaruteqarpoq angajoqqaat innuttaasullu akisussaaffimminnut eqeersimaarnerulernissaat ajornartorsiut oqartussanut ingerlanneqartinnagu. Taamaattumik pitsaavoq Iliuseqarasuartarnerit angisuumik eqqartorneqarlernikuummata taamatullu Suliniut MANU, angajoqqaat angajoqqaajullu arnerunissaat anguniarlugu.

Aamma periarfissaq manna iluatsillugu kattuffik MIO qutsavigerusupparput sulinerminni perorsaaneq ilaatimmasuk, tamanna assut qujansuutigaarput.

Siunnersuuteqartup siunnersuummini eqqaavai nammineq piumassuseq tunngavigalugu sullissinermi suliniutit assigusut aallartinneqartarsimagaluartut, suliniulli unissimavoq nammineq piumassutsiminnik suleqataarusuttut ikippallaarsimmata. Tamanna ajoraluartumik sumiiffinni arlalinni takusarparput.



Demokraatini isumaqarpugut pingaaruteqartoq amerlanerusut paasissagaat qanoq piumassutsimik suleqataasut ikiuuttarnerat pisariaqartinneqartigisoq, timersornerup iluani, inunnik isumaginninnerup iluani, kulturip iluani allarpassuarnilu.

Ullumikkut takusarparput nammineq piumassutsiminnik sullissisartut ikiliartortut. Neriuppugut massakkuinnaq taamaattoqartoq aamma innuttaasut piumassutsiminnik ikiuukkumatunertik nassaareqqikkumaaraat.

Naalackersuisut isumaqatigaagut oqarmata meeqqat unnuaannarmi aneertartut pillugit suliassarujussuaq pitsaanerpaamik iluarsineqarsinnaasoq najukkami aamma ilisarnartut atorlugit iluarsiiartoqarpat.

Uani naatsumik Qaanaaq aallaavigilaarlara. Tassani Meeqqat Illersuisuata tikeraarnerani nunaqqaataasut isumaqatigiissutigisimavaat akisussaaqataarusullutik illoqarfimminnilu inuttut ajornartorsiutit akiorniarnneranni nammineq piumassuseq tunngavigalugu sullissineq annertusarumallugu. Sapiitsuliorneruvoq tamanna kusanarlunilu aamma Demokraatiniit assorsuaq nersualaarussuppagut, takutitsimmatat najukkami suliassat aallaavigalugit suliniutinik nutaanik aallartitsisoqarsinnaasoq najukkami suliassat aallaavigalugit.

Isornartutut isigaara uani siunnersuummi allaaserineqarsimanngimat ukiumut 4 millioner koruunit tigussaasumik qanoq atorneqartarniarnersut. Siunnersuuteqartup tamanna itisililaarsimasariaqaraluarpa.

Neriuppunga piffissap ingerlanerani pisortat nammineq piumassutsiminnik sullissisartut aallartissimasaannik immikkoortunik suli amerlanerunik tigooraassanngitsut, pingaaruteqarmat innuttaaqataasutut ataatsimut akisussaaqataanissarput, kivitseqataanissarpullu pisariaqarfiini.

Paatsoorniaqinasinnga; imaanngilaq isumaqartunga pisortat pisinnaanngitsut imaluunniit taamaaliorinnaanngitsut, isumaqartungaana pingaaruteqartoq nammineq piumassutsiminnik sullissisartut inuiaqatigiinni atortuarneqarnissaat, nalilerujussuaq tamanna paarillluartariqaratsigu.

Taamatut oqaaseqarluta siunnersuutip itigartinneqarnissaa inassutigaarput.